

Garantia duna dor di Bestuurscollege na 1985 ta fatal!

GOLDEN TULIP YA A COSTA ARUBA MAS DI 25 MIYON

ORANJESTAD(AAN)—

E garantia cu Bestuurscollege di Aruba na 1985 a dicidi di duna pa Golden Tulip, a bira e garantia mas desastroso pa Aruba. Ya e pais Aruba mester a hinca mas di 25 Miyon caba den e asunto aki. Y den e suma aki interes no a worde incorpora!

Segun e rapport di Algemene Rekenkamer, na aña 1991 atrobe Aruba a keda responsable pa pago di mas di 3 Miyon y Mey Florin basa ariba e garantia cu a worde regla pa Golden Tulip segun Landsverordening di dia 30 di Mei 1985.

E garantia aki semper a worde considera uno di e peor garantianan cu Aruba a conoce y en berdad e ta stranguila Aruba financieramente.

Aña pasa e suma di mas di 3.5 Miyon aki a worde paga for di e fondo di Plan nan Pa mas Aña. Esaki a haci cu en total ya Aruba a paga mas di 25 Miyon pa e proyecto aki.

Mientras Golden Tulip ta un problema pa trahadornan, e ta sigui costa Aruba placa. Si e aña aki no yega na un solucion atrobe Aruba lo

mester paga.

Mientrastanto Aruba no ta haya tende ki plan Gobierno tin cu e hotel. Na 1986, ora Gobierno a cambia, e experto financiero internacional Mehran, tabata sigui e plan di Gabinete Eman pa haya refinanciamiento pa e proyecto den cuadro di e plannan di Gabinete Eman pa refinancia tur proyecto cu tabata tin garantia y asina evita problemanan, cu por a surgi pa Aruba.

Cu cambio di Gobierno, e maneho di Gobierno Eman y e plannan cu gobierno anterior a laga atras, a keda revoca. Sinembargo Gobierno Oduber no a bini cu ningun plan concreto mas pa atende e asunto di garantianan y e proyectonan tranca.

Ta aña pasa ora barco a cuminsa pega, a dicidi di bay institui e Comision Biesheuvel, cu a emiti un rapport cu ainda ta secreto di Gobierno.

Mientrastanto Pueblo ta paga y sigui paga mientras no solamente mal propaganda turistico pero angustia ta worde crea na trahadornan.